

UN FASE NOBO PA UNOCA

INTRODUCCION DI DIRECTORA NOBO, SRA NATHALY HARMS-ELLIS



UNOCA ta e fundacion cu ta stimula cultura di Aruba door di respalda iniciativanan innovativo cu ta desaroya talento cultural y crea participacion activo den cultura na Aruba. Creando un brug entre cultura y sociedad.

Fase transitorio

Por indica cu aña 2015 tabata un aña critico y no facil pa UNOCA na unda cu tabata tin varios reto den e organisacion. Despues di 30 aña brindando servicio na pueblo y sector cultural e momento clave a yega pa un evaluacion interno cu a conduci na inicio di e fase transitorio di UNOCA. E fase transitorio a wordo encamina pa medio di un directiva interino cu a wordo apunta temporalmente y cu a dedica oranan di trabao na e restructuracion di UNOCA. Mirando cu UNOCA ta ricibi fondonan publico desde aña 2011 tabata responsabel pa crea transparencia relaciona cu e situacion financiero di UNOCA. Pa

e motibo aki e directiva interino a tuma e decision pa no aproba proyecto nobo pa asina por tin espacio pa por haci e trabao necesario. Na mes momento a saca dos comunicado den cua a informa cu proyectonan aproba caba lo wordo procesa y ehecuta como tal. Tur esaki cu e meta principal pa profesionalisa UNOCA y asina por brinda e mihor servicio na sector cultural y comunidad di Aruba.

Trayecto Deloitte

Un elemento cardinal den e fase transitorio tabata e trayecto cu UNOCA e encamina cu Deloitte. Despues di a consulta 3 diferente compania den sector priva a ricibi e mihor oferta di Deloitte. Hunto cu Deloitte UNOCA a traha na profesionaliza su procesonan interno na unda a enfoca riba: un plan strategico, sistema administrativo pa

peticionario nobo, sistema di evaluacion y crecimiento pa empleado, reglamento pa personal, reglamento pa directiva, contract pa personal. Esencial den e trayecto di profesionalizacion tabata e empleadonan di UNOCA cu a keda haci maximo esfuerzo pa hiba nan organizacion dilanti. E sesionan stragico a conduci na diseño di algun proceso cardinal pa e organizacion cu lo posiciona UNOCA como e partner strategico den sector cultural.

Directora nobo

E trayecto cu a encamina cu Deloitte a conduci den nombramento di directora di UNOCA, sra. Nathaly Harms-Ellis. Por menciona cu tabata tin varios solicitud pa e posicion di directora. Despues di evaluacion entre dos candidato fuerte a conclui cu sra. Harms tabata e persona pa por sigui encamina e fase nobo di UNOCA y a wordo apunta oficialmente como directora di UNOCA desde Jan 18, 2016. Sra. Harms-Ellis ta casa y mama di dos yiu. E tin un Masters Degree den Business Administration for di Universidad di Aruba y a fungi como directora di YMCA desde 2013. Su habilidad pa atende cu retonan social, hunto cu su liderazgo, experiencia a bira un combinacion di exito importante pa YMCA. Nos ta sigur cu den su posicion nobo como directora di UNOCA e lo tin e mes

un resultado. Nathaly su vision pa cu arte y cultura siguramente lo contribui na bienestar di e sector aki y lo logra cambianan positivo. UNOCA lo continua eherce su tarea como brug entre cultura y sociedad.

Futuro di UNOCA

Por indica cu futuro di UNOCA lo enfoca riba responsabilidad, inovacion, profesionalismo y colaboracion. Lo introduci criteria nobo pa aplicacion y lo crea transparencia den con e organizacion ta funciona. Esencial den esaki ta democratizacion di nos fondo cultural cu

enfoca riba entre otro, estimulacion di talento nobo y reconocimiento di experiencia di nos baluartenan cultural.

Invitacion

Ta un honor di por invita pueblo artistico y sector priva pa acudi na e prome anochi informativo di UNOCA dialuna 1 di Februari 2016 di 7:00pm pa 9:00pm na oficina di UNOCA, Stadionweg 21. Durante e anochi aki lo introduci e maneho y imagen nobo di UNOCA. Si bo ta interesa pa asisti na e evento aki please registra na nos mailing list riba www.unocaruba.org.

